


LETTRE

no. 1

DECLARATOIRE

DE LA DOCTRINE DES
PERES IESVITES CONFOR-
me aux decrets du Concile de
Constance, adreesee à la Royné
mere du Roy Regente en France.

Par le Pere P. COTON, de la Compagnie
de IESVS, Predicateur ordinaire
de sa Maieste.



A PARIS,

chez CLAYDE CHAPPELET, rue
S. Iacques, à l'enseigne de la
Licorne.

M. DC. X.

Avec privilege du Roy.

Case 4

7

39

1376

1625 DEC

2000



A LA ROYNE
MEREDV ROY,
REGENTE EN FRANCE.



ADAME,

DIEU ordonnoit
en l'ancien Testament
que l'on ne fist bouil-
lir le cheureau dans le lait de sa mere;
pour enseigner, comme l'expose
Philon le Iuif, qu'il ne faut surchar-
ger de nouvelle affliction celuy, qui
d'ailleurs est opprimé.

Suyuât ceste regle dictée de la mes-
me nature; ceux de nostre Societé es-
peroient qu'à ce funeste accident, qui

A ij

a esbranlé de sa secousse les deux Poles de la Chrestienté, ils auroiét du moins le soufle libre, pour soupirer apres leur incomparable perte : perte qui leur est autant particuliere, qu'elle est à tous generale & commune. Mais il leur en a pris comme à ceux, qui se rencontrent sous la ruine d'un edifice, où vne pierre n'attend l'autre pour couvrir & accabler ceux sur lesquels elle tombe. Nous estions de cœur & de corps occupez à la translation de ce precieux gaige & remarquable depost, qu'il pleut à vostre Majesté de faire consigner en nos mains par celles de Monseigneur le Prince de Conty, & auquel les principaux Seigneurs de la France rendirent les derniers honneurs; quand quelques-uns peu affectionnez à la Religion Catholique, & à ceux de nostre prolessio, pour nous descrier, & faire profit de nostre absence, semerent des

bruits tant esloignez de vraysemblance & probabilité, quel'on n'auroit iamais estimé, telles calomnies pouuoir entrer, ny mesmes en resuant, en l'opinion d'une ame raisonnable. Ce fut à l'occasion d'un mauuais liure, la doctrine duquel a esté à bon droit condamnée par la Cour de Parlement; les vns soustenans que la doctrine contenue audict liure estoit commune à tous les Iesuites; autres qu'elle estoit tellement particuliere à son Autheur, que plusieurs de la mesme Cópagnie auoient escrit au contraire, & tous ensemble l'auoient cōdamnée en corps de Congregation prouinciale, il y a quelques annees. Different que les moins passionnez terminerēt, concludās que le desauœu en feroit la raison, & qu'il falloit attendre ce que nous en dirions. Surquoy ayant esté nommé en particulier; c'est Madame, ce qui me met presentement la plume en

main, pour vous représenter, comme à celle qui est vniquement affectionnée à la vraye Religion, la plus intéressée au bié de cet estat, & le plus assuré asyle que l'innocence puisse auoir, ce que les Docteurs de nostre Compagnie ont escrit sur ce subiect, sçachant que la grandeur des affaires ne vous permettroit aisément d'en faire par vous mesme la recherche; ny le peu d'affection que nous portent les mesdisans, de vous en faire le veritable rapport. Et apres cela ie declareray avec la mesme briefuete, quel est le sens cômun, quelle la creance de nostre Societé esparse par l'vniuers, touchât la matiere dont il est questiô. Le tout presupposât vne verité qui ne peut estre reuocquee en cōtrouerse, ny mesme par les haineux ou enuieux de cette florissante corône: A sçauoir que le subiect qui fut debatû au concile

de Constance & qui depuis a esté déclaré plus amplemēt par les Docteurs Catholiques, concernant l'expulsion des Tyrans ne touche en rien l'heureuse renommee & la tres-honorable memoire de celuy dont nous deplo-rons le tref-pas; sa vie ayant esté autāt esloignee du blasme de Tyrannie qu'ell' a esté & sera à iamais à tous les Monarques de la terre, le modele de de pieté, iustice, clemence, valeur, debonnaireté, & affection paternelle enuers ses subiects.

En premier lieu, l'Illustrissime Cardinal Tolet se presente à nos yeulx, personnage de rare sçauoir, Espagnol de nation & François d'affectiō. C'est au liure cinquiesme de la Sōme, chapitre sixiesme, où il enseigne en termes exprés, qu'il n'est loysible d'attēter sur la vie du Prince, ores qu'il abuse de son pouuoir: & adiousté que de maintenir le contraire c'est

une doctrine heretique condamnée
au Concile de Constance.

Le tres-Illustre & tres-docte Bel-
larmin respondant à ceste mesme ob-
jection, au chapitre treiziesme de sa
responce Apologetique au liure du
Roy de la grand Bretagne, dit ainsi, Je
n'ay iamais leu ny ouï dire que la vie
eternelle soit promise à ceux qui at-
tentent sur la vie des Rois; ains au cō-
traire, j'ay leu que l'article qui dict,
tout Tyran peut & doit licitement estre
occis, fut iadis condamné en la
session quinziesme du Concile de
Constance. Bien est vray que Iean
Vviclef Anglois, celuy que les Prote-
stants prisent tant, & les loüanges du-
quel ils ont placardé au frontispice
de leurs histoires, enseigna qu'il n'y a
plus de Seigneur Ecclesiastique ou
Ciuil depuis que l'un & l'autre est
tombé en quelque péché mortel. Er-
reur que ledict Concile condamna
en la

en la session huietieme.

Gregoire de Valence, homme de
sçauoir eminent, comme en fait preu-
ue le tesmoignage public que luy
ont rendu l'Italie, l'Espagne & l'Alle-
magne, escriuant sur la seconde par-
tie de sainct Thomas, question 64.
& se conformant à la doctrine des
autres Theologiens del'eschole, de-
termine qu'il n'est nullement permis
d'attenter sur la vie du Prince, iacoit
qu'il abuse de son autorité.

Alphonse Salmeron au 13. tome de
ses œuvres, exposant le 13. chapitre de
l'Epistre aux Romains, enseigne le
mesme; cite le Concile de Constance,
& rapporte le faict d'Aod sur Eglon
Roy des Moabites, au commande-
ment de Dieu exprés & manifeste,
duquel personne ne peut estre le Iu-
ge en son particulier.

Martin del Rio, qui s'est pareille-
mēt signalé, par toute sorte de bons

escrits, en les cōmentaires sur l'Her-
cules furés de Seneque, nombre 920.
dict que la sentēce du Poète est peril-
leuse, & allegue au contraire le de-
cret du Concile de Constance, qui
ne peutestre trop souuent inculqué,
reiteré, & déclaré au peuple en ceste
matiere.

Sebastien Heissius en la declara-
tion Apologetique des Aphorismes
attribuez à la doctrine de Iesuites,
montre par les propres paroles de
Mariana, qu'il a parlé de sa teste, &
queluy mesme s'aperceuant qu'il ex-
cedoit les limites de la doctrine com-
mune, auoit recogneu qu'il estoit
subiect à erreur, & s'estoit soubmis à
la césure de qui que ce fust, in media-
temēt apres il apporte sō opiniō & la
commune de tous les Theologiens
de nostre Compagnie, qu'il contre-
poincte à celle dudit Mariana.

Martin Becanus en la responce au

9. Aphorisme, renuoye le Lecteur au Concile de Constance, montrant que le Prince legitime, ne perd sa superiorité encore qu'il deuienne Tyran.

Iacques Gretserus Lecteur en Theologie à Ingolstad, en son liure intitulé *Vespertilio Hæreticopoliticus*, respondant aux obiections qui luy auoient esté faictes sur l'opinion de Mariana, dict auec Heiffius, qu'il se faut tenir à la commune, laisser la particuliere de Mariana, & queluy mesme l'a soubmise à celle des autres.

Leonard Lessius Lecteur en Theologie à Louuain, au liure second *De Iustitia & iure*, chapitre neufiesme, doute quatriesme, s'accorde pareillement à la sentence commune; qu'il n'est loysible d'entreprendre sur la persône du Prince, encores qu'il abuse de son pouuoir; appuyant son di-

re sur l'aduertissement du Prince des Apostres) *Serviteurs soyeZ subiects à vos Maistres & non seulement aux bons & modestes, mais aussi aux aspres & facheux;* Puis il allegue le decret sus-mentionné du Concile.

Nicolas Serier, escriuant sur le chapitre troisieme du liure des Iuges, en la premiere question, monstre que le faict d'Aod ne peut, & ne doit seruir de preiugé ou exemple aux detestables assassins, parricides & meurtriers de leurs Roys.

Iean Azor en la 2. partie de ses Institutions morales, liure vnzieme, chapitre cinquiesme, question dixieme, se monstre encores plus ennemy de l'audace & des sacrileges attentats de ceux qui entreprennent sur la vie des Princes; enseignant qu'il n'est mesme loisible d'attenter sur la vie de ceux qui seferoiét iniustement emparez de quelque estat; fondant son

dire principalement sur ce que personne ne doit estre condamné sans estre ouïy, & sans cognoissance de cause, de laquelle aucun particulier n'est iuge competant.

Quant à Lois Richecome, ses Apologies font preuue peremptoire de la hayne irreconciliable qu'il porte à la doctrine de ceux qui dogmatisent contre l'autorité des Roys, de sorte que le sieur Pasquier mesmes, critique Censeur de ses œuvres, apres auoir rapporté ses paroles, au liure 3. chap. 5. le louë & dit, qu'il ne peut qu'il ne l'ayme, adioustant ces paroles, *Encor faut-il que ie t'honore te voyant pourtraire l'idée de l'obeissance que le suiet doit à son Roy.* Louange qu'il eust peu donner à plusieurs autres de la mesme société, lesquels apres auoir examiné cette matiere avec S. Thomas & toute l'Eschole, cōcluent tous cōformemēt à la Sorbone & a ce qu'e a determiné le cōcile de Cōstance.

Tel doncques estant le sens & telles les sentences de ces Docteurs, graues & signalez de nostre Cópagnie, quel preiudice peut apporter l'opinion particulere de Mariana à la reputation de tout vn Ordre, lequel estant selō son Institut, extrêmement ialoux de la manutention des sainctes ordonnances de l'Eglise, & respectāt la puissance & authorité des Roys, qui pour le temporel releuent de Dieu seul, a des lōg temps desauoué la legereté d'une plume essorce, & nommément en la Congregation Prouinciale de Frâce tenuē en cette ville de Paris, l'an 1606. où d'abodant le Reuerend Pere Claude Aquaiua General de nostre Compagnie fut requis, que ceux qui auoiēt escrit au preiudice de la Couronne de Frâce, fussent reprimez & leurs liures supprimez: Ce que ledit Reuerend Pere a faiēt depuis fort serieusement & exactement, tres-marry que par

mesgarde, en son abséce, & sans auoir
 veu l'œuvre on se fust seruy de son ad-
 uen: Les paroles d'ot. il ysa en sa respô-
 se sont telles. Nous auôs approuué le
 iugement & le soin de vostre Cõgre-
 gation, & auons esté grandement at-
 tristez, quel'on ne se soit apperceu de
 cela qu'apres l'impression de tels li-
 ures: lesquels toutes fois nous auons
 soudain commandé d'estre corrigez
 & aurons soin tres-exacte desormais
 que telles choses n'aduiennent.

De faict à grand' peine trouueroit
 on maintenant vn seul exemplaire de
 Mariana, n'eust esté la pernicieuse li-
 beralité des heritiers de Vyechel, que
 l'on scait estre de la Religion preten-
 tendue reformee, qui l'ont faict im-
 primer à leurs propres coultz, non tât
 poussez, comme il est aisé a presumer,
 du desir de seruir le public, que de nu-
 yre au particulier de nostre Comp-
 gnie. Aucuns ont estimé qu'ils y a-

uoient adiousté du leur; autres, que ceux de la premiere impressiō estoient encore pires: controuerse qui ne sert de rien: car quand ainsi seroit, & que l'on n'auroit presté aucune charité à ceste plume mal taillee, il n'y a aucune raison pour laquelle elle doie plus tost incommoder le corps de nostre Societé, que les escrits de Iean Petit, & autres, les Vniuersitez, & Ordres dont ils estoient Escholiers, Bacheliers, Maistres & Docteurs.

Mais d'autant, Madame, que j'ay promis cy-dessus d'exposer clairement & distinctement quelle est nostre creance touchant la matiere proposee, ie viens à ce point, qui fera la derniere part de ceste declaration.

1. Tous les Iesuites en general & en particulier signeront, voire de leur propre sang, qu'ils n'ont en ceste matiere, ny autre quelcōque, autre foy, doctrine, opinion,

opiniõ que celle del'Eglise vniuerselle. 2. En secõd lieu qu'entre toutes les sortes de gouuernement & administratiõ publique, la Monarchique est meilleure.

3. Que tel est le gouuernement spirituel del'Eglise, qui se rapporte au Vicaire de Iesus-Christ successeur de S. Pierre, tel le temporel del'Estat & Royaume de France, qui se termine à la personne du Roy nostre Souuerain Seigneur & Maistre.

4. Que les Roys sont, comme les apelloit Homere, les enfans & nourrissons de Dieu; ou plustost, *son image animee*, comme disoit Menandre.

5. Qu'ils sont oingts, & partant surnommez les Christs du Seigneur, afin (dit Simeon Archeuesque de Thessalonique) que chacun entende qu'ils sont inuiolables, & doiuent estre respectez comme choses saintes & sacrees.

6. Que c'est vne dānable heresie, ainfi
^{l. 5}
^{6. 24} que l'a remarqué saint Irenee, il y a
 14. cents ans, de croire que les Roys
 soient donnez aux hommes par cas
 fortuit, attendu que toute puissance
 vient de Dieu. Et pour ce, dict saint
 Isidore de Damiette, és plus ancien-
 nes peintures nous voyons vne main
 sortant du Ciel qui leur met vne Cou-
 ronne sur la teste.

Rom
^{32. 1} 7. Que qui resiste aux Roys ou se re-
 belle contr'eux, il acquiert sa damna-
 tion, selon la doctrine del'Apostre.

8. Que l'obeyssance leur est deuë, non
 pource qu'ils sont vertueux, sages,
 puissans, ou doüez de quelques autres
 louables qualitez; mais pource qu'ils
 sont Roys establis de Dieu.

9. Que nos Roys en France sont les
 aînez de l'Eglise, douez de priuileges
 rares & signalez par dessus le commū
 des autres Roys de la terre.

10. Qu'il n'est loisible de leur desnier

obeyſſance, & beaucoup moins de ſe
 reuolter contr'eux, encore qu'ils
 fuſſent vitieux, difficiles à ſupporter, ^{1. Pet.}
 & diſcoles, comme parle le meſme ^{2. 18}
 Apoſtre.

11. Qu'en tel cas on doit prier pour
 eux, comme le Prophete vouloit qu'il
 fuſt fait pour la proſperité de Nabu- ^{Bar.}
 chodonozor, & de ſon fils Baltazar; ^{1. 11}
 & que les afflictions, pertes de biens,
 perſecutions, & autres incommodi-
 tez que l'on endure patiemment, ſans
 ſe rebeller pour cela contre les ſupe-
 rieurs, ſont choſes tres-aggreables à
 Dieu, & conformes à la loüange; qu'en ^{Heb.}
 pareil cas S. Paul dône aux Hebreux, ¹⁰
 & à l'Ordonnance qu'il a publiée en ^{34.}
 l'Egliſe, diſant, *Que toute ame ſoit ſuiette*
aux puiſſances ſuperieures.

12. Et partant, que non ſeulement il
 n'eſt point loiſible d'attenter ſur leurs
 perſonnes, mais que c'eſt vn execrable
 parricide, forfait prodigieux, & dete-

stable sacrilege.

13. Que le decret du Concile de Constance en la session 15. doit estre receu de tous & maintenü inuiolable.

14. Que la declaration de Sorbone de l'an 1413. & celle du 4. Iuin de la presente annee est saine, sainte, & salutaire.

15. Que chacun doit estre aduerty de prendre garde à plusieurs liures qui courēt cōtre les Edicts, la lecture desquels est non seulement en ceste matiere grandement dangereuse, mais d'autant plus à craindre que leurs auteurs s'estans, à nostre extreme regret separez de l'Eglise Catholique, ne content pour rien le Concile de Constance, les censures Catholiques, & les Docteurs sus-mentionez; ains ce qui est à deplorer se fortifient dauantage en leurs opinions par leur oppositio, & semblent se rendre d'autat plus recommandables à leurs admirateurs.

I'en marquerois les endroits, speci-

fierois les passages, & alleguerois les paroles, nestoit qu'il vaut trop mieux qu'elles demeurent englouties dans l'abyfme de l'oubly, & qu'il est plus à propos de faire voir que l'innocence a de meilleures armes que la recri-
mination.

Et pour ceste raison encore me feroi-je abstenu du tout de cet aduertissement, n'eust esté pour monstrier que le corps de nostre Compagnie ne peut estre infecté par l'opiniô d'un seul, lequel elle a si authentiquement desaduoué, non plus que ceux de la Religion pretenduë reformee ne se sentent aucunement interessez par la doctrine erronee de quelques vns des leurs, lesquels ils reiettent, desaduouent & condamnent; voulans viure avec nous sous les loix du Royaume, & avec l'obeissance & volontaire soubmission que nous rendons au sceptre de nos Roys: me persua-

dant que s'ils auoient la plume que
 j'ay en main, ils diroient avec nous, &
 fulmineroient d'une commune voix
 contre tels infames auteurs, anathe-
 me. Ce que meurement & sagement
 considéré, tant par la Cour de Parlemēt,
 que par le sacré College de Sorbone,
 ils n'ont fait aucune mention en leur
 arrest & decrets, de la doctrine des
 Iesuites : Scachans tresbien, comme
 Iuges & Docteurs equitables, que
 les fautes sont personnelles, qu'il n'y
 auroit point d'innocence au monde
 si la coulpe de l'un estoit imputee à
 l'autre, & que ç'a esté vne deplorable,
 & incommunicable propriété du pe-
 ché que comit le premier hōme, d'a-
 uoir eu son estendue sur les autres, à
 cause que sa posterité estoit represen-
 tee en sa personne, Scachans aussi
 d'ailleurs par la reïteree depositiō du
 malheureux, que Mariana n'auoit en
 rien contribué à l'exécrable parric-

cide, & ne l'auoit peu faire, attendu que ce meschant n'auoit suffisante intelligence de la langue en laquelle s'oliure estoit escrit. En quoy se descouure la peu charitable intention de ceux qui vont disant, qu'il le sçauoit tout par cœur, afin de reietter la haine publique de ce malheur sur autres que sur le coupable. C'est donc en cet endroit MADAME, où vous estes treshumblemēt suppliee d'employer vostre supreme autorité, & ordonner que tous ces escrits, qui sont au commencement allumettes de rebellion, & en peu d'heures deuiennent flambeaux de sedition, soyent ostez de deuant les yeux des Frāçois. Vous estes nostre souueraine Dame doüce de Dieu d'un entendement sublime, & d'une vertu qui a peu de semblables, & qui voyez clairement de cōbien il importe que nous viuiōs vnis; puis que ce n'est en mesme foy, à cau-

se de l'iniure du temps, du moins en
 fidelité, obeissance, & mutuelle affe-
 ctiō à la cōseruation de la paix. Nous
 auons vn Roy qui nous represente
 en son bas aage l'esprit & la substance
 du grād Héry son Pere, vostre espoux,
 & qui avec l'accroissement des an-
 nees aura, moyennant qu'il plaise à
 Dieu continuer sur luy ses benignes
 influences, sa valeur, sa prudence, son
 bon-heur, & son experience. C'est à
 nous de cherir ce thresor, seruir de
 bon cœur ce grand & petit Maistre,
 & obeir volontiers à vous, la tres-ho-
 noree mere, nostre Regente & Mai-
 stresse. Et afin que rien ne trouble l'v-
 nion, qui seule peut, apres Dieu, con-
 seruer ceste puissante Monarchie, &
 la rendre tousiours redoutable à ses
 ennemis; combien seroit-il desirable
 MADAME, que l'on n'apperçéust par-
 my nous aucunes mesdisances, que
 l'imposture fust bānie, les imposteurs
 receussent

receussent le salaire deu à la calomnie, les rancunes fussent desracinees , & quand quelque sinistre rapport nous est fait, l'on suspendist le iugement: Et en vn mot que selon le conseil de l'Apostre , l'on maintint inuiolable le lien de charité.

Les Otacoustes & Profagogides de ce temps sont grandement à craindre; aussi sçait on asseuremēt qu'il ne tiendrait à vostre Majesté, que telles langues ne receussent la recompense des anciens Quadruplateurs. Mais s'ils ne la reçoient des hommes, ils la doivent attendre de la iustice inéuitable de celuy qui est l'Auteur, Protecteur, & en fin Remunerateur d'innocence.

Nostre petite Compagnie est entre & sur toutes les familles Religieuses la plus exposée à la haine & à la calomnie de ceux qui ne prennent la peine de la cognoistre: & vous sçavez, Ma-

dame, combien de fois le feu Roy nostre bon maistre luy a fait ceste faueur de la defendre & faire recognoistre: vous pouuez tesmoigner, & persône ne scait mieux que vous, que là où le trouuoit ce grand Prince nous y auions vn Roy, vn Pere, vn Protecteur. Mais helas il n'est plus! le grand Henry nous a esté rauy!

O France, œil de la Chrestienté, rose des Empires, & la perle du monde; que ceste perte est grande pour toy! que ce naufrage est horrible! France la fauorie du Ciel & la bien aymée de Dieu, qui t'a osté le mâteau de gloire qui te couuroit, & la Couronne d'honneur qui se releuoit si hautement sur ton chef? qui t'a ainsi, la choisie de Dieu, qui t'a ainsi affligée? Mais toy pauvre Societé qui ne subsistois que par les benefices de ce Monarque, qui t'a ainsi desolée! si deplorablement abaissée! si miserablement accablée! le

malheur est commun à to⁹, mais il est singulierement particulier à toy ; ce coup a frappé tout le corps du Royaume, mais il t'a nauré presque mortellement. O combien il est vray, & combien sensiblemēt tu l'experimentes, que la douleur qui se peut dire, ne se peut dire douleur ! Et moy qui es-cries ces choses combiē ay-ie de raison, voire plus que tout autre, de me laisser aller aux tristes accents d'une voix explorée, & de dire, Adieu ô la merveille des Roys: Adieu l'ornement du siècle, nostre ioye, nostre gloire, nostre honneur: Adieu Pere de la chose publique ; Restaurateur de l'Estat, second Fondateur & premier bien-facteur de nostre Compagnie. Adieu mon Roy, mon Prince, mon Defenseur. Vous nous auiez donné en ceste vallee de larmes le repos que l'on y peut auoir, reposez dōc en paix ; soyez à iamais entre les lis & les roses,

deliuré de la charge espineuse de ceste
 Monarchie: Iouïſſez bien-heureux ne
 de la terte, mais du Ciel: Icy vous auez
 esté le ſuject tres- eminent de la gra-
 ce de Dieu, ſoyez là haut maintenant,
 & pour tousiours l'obiet de ſes miſe-
 ricordes. Les lauriers de ceste terre
 baſſe fleſtriſſent trop aiſement, voſtre
 chef en attendoit de plus verdoyants.
 Les victoires, les triumphes, & les Em-
 pires qui vous regardoient icy-bas, de-
 uoient eſtre changez envne plus emi-
 nente gloire. Viuez donc à iamais
 iouïſſant de ceste poſſeſſion tant deſi-
 rable. Voſtre bon heur nous fera reſ-
 pirer; voſtre abſence nous fera ſouſ-
 pirer, & le lieu où nous eſtimons que
 vous eſtes nous y fera aspirer. Car, ap-
 puyez ſur la miſericorde de Dieu,
 les funeſtes circonſtances de voſtre de-
 cez ne nous oſtét l'eſperance de vous
 reuoir au beau ſeiour d'un commun
 iour, là où nous trouuerons le

principal & les apports de ce facheux
 diuorce. Et pendant l'ennuy de ceste
 attente, vous, Madame, avec le Roy
 sa viue image, essuierez vne partie de
 nos larmes; No^r recognoistrôs sa per-
 sône en vos persônes; sa Courône en
 vos Courônes; & sô autorité Royale
 en la vostre. Et bié que tous vos sub-
 iects y soyent tenus par toute sorte de
 deuoirs, nostre Compagnie y estant
 extraordinairement obligee, me char-
 ge de presenter aux pieds de vostre
 Maïeste les plus sincerés vœux de sa fi-
 delité & plus affectueuses offres de sô
 tres-humble seruice, Ce que ie fais,

MADAME, d'autant plus volon-
 tiers que ie suis d'un ressentiment sin-
 gulier,

De V. M.

Le tres-humble seruiteur, tres-
obeissant, & tres-fidele subiect,

PIERRE COTON, de
 la Compagnie de
 IESVS.

Extrait du Priuilege du Roy.

PAr grace & priuilege du Roy, il est permis à Claude Chappelet, Libraire iuré en l'Vniuersité de Paris, d'imprimer, ou faire imprimer & mettre en vente vne Lettre Declaratoire de la doctrine des Peres Iesuites conforme aux decrets du Concile de Constance, adreesee à la Royne mere du Roy Regente en France. Par le P. P. COTON, de la Compagnie de IESVS, Predicateur ordinaire de sa Maiesté. En faisant deffences tres-expresles à tous Libraires, & Imprimeurs ou autres de quelque qualité & condition qu'ils soyent, d'imprimer, ou faire imprimer ladite lettre, vendre ou faire vendre, debiter, ny distribuer par nostre Royaume, ny ailleurs, durant le terme de six ans, sur peine aux contreuenans, de confiscation des exemplaires, & d'amende arbitraire, & de tous despens, dommages, & interests, cōme il est contenu és lettres données à Paris, le 26. Iuin 1610. signees & scellees du grand sceau en cire iau-ne.

Par le Roy en son Conseil.

POVSSEPIN.